



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՍԱՀՄԱՆԱԴՐԱԿԱՆ ԴԱՏԱՐԱՆ**

**ԴԱՏԱԿԱՆ ԿԱԶՄԻ ՈՐՈՇՈՒՄ**

**ԱՆՀԱՏԱԿԱՆ ԴԻՄՈՒՄԻ ԸՆԴՈՒՆԵԼԻՈՒԹՅԱՆ ՎԵՐԱԲԵՐՅԱԼ**

Քաղ. Երևան

21 հունիսի 2021 թ.

Սահմանադրական դատարանի դատական կազմը՝

Նախագահությամբ՝	Ա. Խաչատրյանի
Անդամակցությամբ՝	Վ. Գրիգորյանի
	Ա. Թունյանի

Քննության առնելով Նյուրա Բաղդասարյանի անհատական դիմումի  
ընդունելիության հարցը,

**Պ Ա Ր Ձ Ե Ց .**

1. Նյուրա Բաղդասարյանը դիմել է Սահմանադրական դատարան (դիմումը Սահմանադրական դատարան է մուտքագրվել 2021 թվականի մայիսի 31-ին)՝ խնդրելով.

«(...) 4.2.1. Որոշել ՀՀ վարչական դատավարության օրենսգրքի 3-րդ հոդվածի 1-ին մասի 1-ին կետի և 192-րդ հոդվածի 1-ին մասի 1-ին և 2-րդ կետերի՝ ՀՀ Սահմանադրության 28-րդ հոդվածի, 60-րդ հոդվածի 1-ին և 2-րդ մասերի, 61-րդ հոդվածի 1-ին մասի, 63-րդ հոդվածի 1-ին մասի, 75-րդ և 78-79-րդ հոդվածներին համապատասխանության հարցը:

4.2.2. Որոշել ՀՀ վարչական դատավարության օրենսգրքի 80-րդ հոդվածի 1-ին մասի 4-րդ կետի (*այն մասով, որ մասով չի նախատեսում բացառություն, կապված ՀՀ վարչական դատավարության օրենսգրքի 192-րդ հոդվածի 1-ին մասի 2-րդ կետով նախատեսված անձանց կողմից ՀՀ վարչական դատարան դիմելու հետ*)՝ ՀՀ Սահմանադրության 60-րդ հոդվածի 1-ին և 2-րդ մասերի, 61-րդ հոդվածի 1-ին մասի, 63-րդ հոդվածի 1-ին մասի, 75-րդ և 78-79-րդ հոդվածների համապատասխանության հարցը:

4.2.3. Որոշել ՀՀ վարչական դատավարության օրենսգրքի 145-րդ հոդվածի 1-ին մասի 4-րդ կետի (*այն մասով, որ մասով չի սահմանում կարգավորում, որ ՀՀ վերաքննիչ վարչական դատարանը վարչական գործի վարույթը կարող է կարճել բացառապես վերաքննիչ բողոքով վիճարկվող փաստական հանգամանքների և վերաքննիչ բողոքի հիմքերի և հիմնավորումների սահմաններում*)՝ ՀՀ Սահմանադրության 61-րդ հոդվածի 1-ին մասի, 63-րդ հոդվածի 1-ին մասի, 75-րդ և 79-րդ հոդվածների համապատասխանության հարցը:

4.2.4. ՀՀ վարչական դատավարության օրենսգրքի 96-րդ հոդվածի 1-ին մասի 9-րդ կետի (*այն մասով, որ չի սահմանում մինչ վարչական գործի վարույթը կարճելը տվյալ հարցի վերաբերյալ դատավարության մասնակիցների դիրքորոշում լսելու իրավունքի ապահովման իրավական հնարավորություն ՀՀ վերաքննիչ վարչական դատարանում*)՝ ՀՀ Սահմանադրության 61-րդ հոդվածի 1-ին մասի, 63-րդ հոդվածի 1-ին մասի, 75-րդ և 78-79-րդ հոդվածների համապատասխանության հարցը»:

2. Ներկայացված դիմումով բարձրացվում է ՀՀ վարչական դատավարության օրենսգրքի 3-րդ հոդվածի 1-ին մասի 1-ին կետի, 80-րդ հոդվածի 1-ին մասի 4-րդ կետի, 96-րդ հոդվածի 1-ին մասի 9-րդ կետի, 145-րդ հոդվածի 1-ին մասի 4-րդ կետի և 192-րդ հոդվածի 1-ին մասի 1-ին և 2-րդ կետերի սահմանադրականության հարց:

ՀՀ վարչական դատավարության օրենսգրքի 3-րդ հոդվածի 1-ին մասի 1-ին կետի և 192-րդ հոդվածի 1-ին մասի 1-ին և 2-րդ կետերի առնչությամբ դիմողը գտնում է, որ օրենսգրքի 192-րդ հոդվածը նախատեսում է նույն օրենսգրքի 3-րդ

հողվածից տարբերվող կարգավորում: Մասնավորապես, ըստ դիմողի՝ ՀՀ վարչական դատավարության օրենսգրքի 3-րդ հոդվածի՝ որպես ընդհանուր նորմի կիրառումը չի բացառում անձի՝ իր նկատմամբ չկիրառված նորմատիվ իրավական ակտի վիճարկման իրավական հնարավորությունը, քանի որ ՀՀ վարչական դատավարության օրենսգրքի 3-րդ հոդվածը հստակ արձանագրում է «կարող են խախտվել» արտահայտությունը: Ուստի՝ դիմողը նշում է, որ նորմատիվ իրավական ակտերի իրավաչափության վերաբերյալ գործերով պահանջ հայցող սուբյեկտների շրջանակը կարող է պարզվել բացառապես ՀՀ վարչական դատավարության օրենսգրքի 192-րդ հոդվածի և ոչ՝ ՀՀ վարչական դատավարության օրենսգրքի 3-րդ հոդվածի համատեքստում:

Վերոգրյալի համատեքստում դիմողը գտնում է, որ ինքը հանդիսանում է «(...) ՀՀ կառավարության «ՀՀ կառավարության 2014 թվականի ապրիլի 23-ի թիվ 460-Ն որոշման մեջ փոփոխություն և լրացումներ կատարելու մասին» 12.04.2018 թվականի թիվ 443-Ն որոշման թիվ 1 հավելվածով հաստատված նախկին ԽՍՀՄ Խնայքանկի ՀԽՍՀ հանրապետական բանկում մինչև 1993 թվականի հունիսի 10-ը ներդրված դրամական ավանդների դիմաց փոխհատուցման տրամադրման կարգի 20-րդ և 22-րդ կետերն անվավեր ճանաչելու պահանջ ներկայացնելու իրավական շահ ունեցող անձ, քանի որ չի կարողանում ստանալ իր ժառանգված գույքի դիմաց փոխհատուցում՝ հաշվի առնելով Վիճարկվող որոշման 20-րդ և 22-րդ կետերը»:

ՀՀ վարչական դատավարության օրենսգրքի 80-րդ հոդվածի 1-ին մասի 4-րդ կետի վերաբերյալ դիմողը նշում է, որ վերջինս չի նախատեսում բացառություն՝ կապված ՀՀ վարչական դատավարության օրենսգրքի 192-րդ հոդվածի 1-ին մասի 2-րդ կետով նախատեսված անձանց կողմից վարչական դատարան դիմելու հետ: Ըստ դիմողի՝ վերոնշյալ նորմն իր նկատմամբ կիրառելով՝ անդրադարձ չի կատարվել այն հանգամանքին, որ ինքը, «(...) հանդիսանալով ՀՀ կառավարության 2014 թվականի ապրիլի 23-ի թիվ 460 որոշման 1-ին հավելվածի 1-ին կետի 1-ին ենթակետի իմաստով նշված որոշման հասցեատերերից մեկը, (...) այդ որոշման 20-րդ կետի իմաստով արդեն իրեն պատկանող ավանդի դիմաց փոխհատուցում

ստանալու գույքային իրավունքը Կառավարությունը ևս համարում է անձի հետ անխզելիորեն կապված իրավունք և թույլ չի տալիս ժառանգաբար փոխանցել(...): Միաժամանակ, ըստ դիմողի՝ խախտվում է իր իրավական ակնկալիքը, քանի որ իր կողմից իր կյանքի ընթացքում ստանալու ենթակա ավանդի չստացված մասը չի ներառվելու ժառանգության զանգվածի մեջ:

ՀՀ վարչական դատավարության օրենսգրքի 96-րդ հոդվածի 1-ին մասի 9-րդ կետի մասով դիմողը գտնում է, որ վերջինս հնարավորություն չի ընձեռում մինչև վարչական գործի վարույթը կարճելը լսել տվյալ հարցի վերաբերյալ դատավարության մասնակիցների դիրքորոշումը և դրանով չի ապահովում դատավարության մասնակցի՝ գործի քննության ընթացքում գործի վարույթը կարճելու վերաբերյալ դիրքորոշում, առարկություն ներկայացնելու իրավունքը:

Դիմողը նշում է, որ տվյալ դեպքում վերաքննիչ դատարանը, բացահայտելով գործի վարույթը կարճելու ենթադրյալ հիմք, ըստ էության, այս կապակցությամբ չի իրականացրել բանավոր դատաքննություն, չի լսել կողմերի դիրքորոշումը նշվածի կապակցությամբ և սույն դեպքում դիմողին զրկել է դիրքորոշում հայտնելու իրավունքից, որն անքակտելիորեն կապված է անձի՝ Սահմանադրության 61-րդ հոդվածի 1-ին մասով սահմանված արդար դատաքննության իրավունքի և Սահմանադրության 63-րդ հոդվածի 1-ին մասով սահմանված՝ արդյունավետ դատական պաշտպանության իրավունքի հետ:

ՀՀ վարչական դատավարության օրենսգրքի 145-րդ հոդվածի 1-ին մասի 4-րդ կետի կապակցությամբ դիմողն արձանագրում է, որ մի դեպքում օրենսդիրը սահմանում է, որ վերաքննիչ դատարանը կաշկանդված է գործի համար էական նշանակություն ունեցող, սակայն վերաքննիչ բողոքով չվիճարկված փաստերով, մյուս դեպքում՝ վերաքննիչ դատարանին տալիս է լիազորություն՝ կարճելու վարչական գործի վարույթը՝ վիճելի համարելով վարչական դատարանում հաստատված փաստն այն դեպքում, երբ այդ փաստը չի վիճարկվել վերաքննիչ բողոքում:

3. Ուսումնասիրելով սույն անհատական դիմումը և վերջինին կից ներկայացված դատական ակտերը, ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1 և 2-րդ կետերով և 69-րդ հոդվածի 5-րդ մասով՝ Սահմանադրական դատարանի դատական կազմը գտնում է, որ սույն դիմումով գործի քննությունը ենթակա է մերժման հետևյալ պատճառաբանությամբ.

**3.1. ՀՀ վարչական դատավարության օրենսգրքի 192-րդ հոդվածի 1-ին մասի 2-րդ կետի վերաբերյալ**

Օրենքների, դրանց դրույթների՝ Սահմանադրությանը համապատասխանության հարցը Սահմանադրական դատարանը, ի թիվս այլնի, իրականացնում է Սահմանադրության 169-րդ հոդվածի 8-րդ կետի հիման վրա՝ ֆիզիկական և իրավաբանական անձանց ներկայացրած դիմումներով (անհատական դիմումներ): Անհատական դիմումների ընդունելիության հարցերը լուծելիս Սահմանադրական դատարանը ղեկավարվում է «Սահմանադրական դատարանի մասին» օրենքի 29 և 69-րդ հոդվածներով, որոնցով նախատեսված պայմաններից թեկուզ և մեկի բացակայությունը բացառում է անհատական դիմումի քննության ընդունումը Սահմանադրական դատարանում:

«Սահմանադրական դատարանի մասին» սահմանադրական օրենքի 69-րդ հոդվածի 1-ին մասը, կրկնելով Սահմանադրության 169-րդ հոդվածի 8-րդ մասի դրույթները, սահմանում է այն հիմքերը, որոնց միաժամանակյա առկայության պարագայում ֆիզիկական կամ իրավաբանական անձը կոնկրետ գործով անհատական դիմում կարող է ներկայացնել Սահմանադրական դատարան: Դրանք են՝

- ա) երբ կոնկրետ գործով առկա է դատարանի վերջնական ակտը,
- բ) երբ սպառվել են ներպետական դատական պաշտպանության բոլոր միջոցները,
- գ) երբ վիճարկվում է այդ ակտով **իր նկատմամբ կիրառված** նորմատիվ իրավական ակտի դրույթի սահմանադրականությունը, ինչը հանգեցրել է Սահմանադրության 2-րդ գլխում ամրագրված իր հիմնական իրավունքների և ազատու-

թյունների խախտման՝ հաշվի առնելով նաև համապատասխան դրույթին իրավա-  
կիրառ պրակտիկայում տրված մեկնաբանությունը:

Դիմողի համար իրավական հետևանքներ առաջացնող վերջնական դատա-  
կան ակտի՝ վերաքննիչ դատարանի 2020 թվականի հոկտեմբերի 16-ի որոշման  
ուսումնասիրությունը ցույց է տալիս, որ ՀՀ վարչական դատավարության  
օրենսգրքի 192-րդ հոդված 1-ին մասի 2-րդ կետը չի կիրառվել դիմողի նկատմամբ  
և, հետևաբար՝ դիմողը իրավասու չէ ներկայացնել վերոնշյալ նորմի հակասահմա-  
նադրականության վերաբերյալ դիմում:

Վերահաստատելով Սահմանադրական դատարանի 2009 թվականի մարտի  
17-ի ՍԴԱՌ-21 աշխատակարգային որոշմամբ ամրագրված իրավական դիրքո-  
րոշումները՝ Սահմանադրական դատարանի դատական կազմը գտնում է, որ  
«Սահմանադրական դատարանի մասին» սահմանադրական օրենքի 69-րդ հոդ-  
վածի 1-ին մասում նշված որևէ պայմանի բացակայության դեպքում անհատական  
դիմում ներկայացրած ֆիզիկական կամ իրավաբանական անձը Սահմանադրական  
դատարան դիմելու համար **իրավասու սուբյեկտ չէ:**

### **3.2. ՀՀ վարչական դատավարության օրենսգրքի 145-րդ հոդվածի 1-ին մասի 4-րդ կետի վերաբերյալ**

Սահմանադրական դատարանի դատական կազմը գտնում է, որ  
ներկայացված դիմումը՝ ՀՀ վարչական դատավարության օրենսգրքի 145-րդ  
հոդվածի 1-ին մասի 4-րդ կետի մասով, **ակնհայտ անհիմն** է հետևյալ պատճառա-  
բանությամբ.

ՀՀ վարչական դատավարության օրենսգրքի 96-րդ հոդվածի 1-ին մասի 9-րդ  
կետի համաձայն՝ դատարանը գործի քննության ցանկացած փուլում կարճում է  
գործի վարույթը, եթե բացահայտվել են սույն օրենսգրքի 80-րդ հոդվածով  
նախատեսված՝ հայցադիմումի ընդունումը մերժելու հիմքերը:

Նույն օրենսգրքի 80-րդ հոդվածի 1-ին մասի 4-րդ կետի համաձայն՝  
վարչական դատարանը մերժում է հայցադիմումի ընդունումը, եթե հայցադիմում է  
ներկայացրել դրա իրավունքն ակնհայտորեն չունեցող անձը:

Վերոնշյալ նորմերի ուսումնասիրությունը թույլ է տալիս փաստել, որ ՀՀ վարչական դատավարության օրենսգրքի 80-րդ հոդվածով նախատեսված՝ հայցադիմումի ընդունումը մերժելու հիմքերը միաժամանակ հիմք են արդեն վարույթ ընդունված հայցադիմումով գործի վարույթի կարճման համար: Այսինքն՝ դատարանը գործի քննության ցանկացած փուլում գործի վարույթը կարճելու մասին որոշում է կայացնում, եթե բացահայտվել են հայցադիմումի ընդունումը մերժելու հիմքեր: Ընդ որում՝ ՀՀ վարչական դատավարության օրենսգրքի 96-րդ հոդվածի 1-ին մասի ձևակերպումից բխում է, որ գործի վարույթը կարճելու հիմքերի առկայության դեպքում դատարանը պարտավոր է կարճել գործի վարույթը, ինչը վարչական վերաքննիչ դատարանը կարող է իրացնել ՀՀ վարչական դատավարության օրենսգրքի 145-րդ հոդվածի 1-ին մասի 4-րդ կետով իրեն տրված լիազորությունը իրացնելու միջոցով:

Մասնավորապես՝ ՀՀ վարչական դատավարության օրենսգրքի 145-րդ հոդվածի 1-ին մասի 4-րդ կետի համաձայն՝ գործն ըստ էության լուծող դատական ակտի վերաքննության արդյունքում վերաքննիչ դատարանը ամբողջությամբ կամ մասնակիորեն բեկանում է դատական ակտը և կարճում է գործի վարույթն ամբողջովին կամ դրա մի մասը, իսկ բողոքարկված և չբեկանված մասով դատական ակտը թողնում է անփոփոխ:

Տվյալ դեպքում վարչական վերաքննիչ դատարանը, քննելով Նյուրա Բաղդասարյանի կողմից ներկայացված վերաքննիչ բողոքը՝ թիվ ՎԴ/12631/05/18 վարչական գործով կատարել է հետևյալ եզրահանգումը, որ դիմումը ներկայացվել է դրա իրավունքն ակնհայտորեն չունեցող անձի կողմից:

Ինչ վերաբերում է դիմողի՝ գործի վարույթը բացառապես վերաքննիչ բողոքով վիճարկվող փաստական հանգամանքների և վերաքննիչ բողոքի հիմքերի և հիմնավորումների սահմաններում կարճելու փաստարկին, ապա Սահմանադրական դատարանի դատական կազմը արձանագրում է հետևյալը, որ ՀՀ վարչական դատավարության օրենսգրքի 144-րդ հոդվածի 1-ին մասի համաձայն՝ վերաքննիչ դատարանը դատական ակտը վերանայում է վերաքննիչ բողոքում ներկայացված

պահանջի սահմաններում՝ ձեռնարկելով անհրաժեշտ միջոցներ բողոքն ըստ էության քննելու համար:

Վերոնշյալ կարգավորումը կանխորոշում է դատական ակտի վերանայման սահմանները՝ նախատեսելով, որ վերաքննիչ դատարանը կարող է առաջին ատյանի դատարանի կայացրած դատական ակտը վերանայել միայն դատական ակտի բողոքարկված մասով և միայն բողոքում բարձրացված պահանջի սահմաններում:

Ողջ վերոգրյալից բխում է, որ վերաքննության սահմանները վերաբերելի են վերաքննիչ դատարանի կողմից իրականացվող գործի քննության ծավալներին, ինչը, սակայն, փոխկապակցված չէ և որևէ կերպ չի սահմանափակում դատարանի՝ գործի հետագա ընթացքը խոչընդոտող, գործի վարույթի կարճման համար հիմք հանդիսացող հանգամանքի առկայության դեպքում գործի վարույթի կարճման լիազորության իրացումը: Հետևաբար՝ դիմողի փաստարկն առ այն, որ ՀՀ վարչական դատարավարության օրենսգրքի 145-րդ հոդվածի 1-ին մասի 4-րդ կետն այնքանով, որքանով չի սահմանում կարգավորում, որ վերաքննիչ դատարանը վարչական գործի վարույթը կարճում է բացառապես վերաքննիչ բողոքի հիմքերի և հիմնավորումների սահմաններում, **ակնհայտ անհիմն է:**

**3.3. Վարչական դատավարության օրենսգրքի 3-րդ հոդվածի 1-ին մասի 1-ին կետի, 80-րդ հոդվածի 1-ին մասի 4-րդ կետի, 96-րդ հոդվածի 1-ին մասի 9-րդ կետի և 192-րդ հոդվածի 1-ին մասի 1-ին կետի վերաբերյալ**

Ներկայացված դիմումի և կից դատական ակտերի ուսումնասիրությունը ցույց է տալիս, որ ՀՀ վարչական դատավարության օրենսգրքի 3-րդ հոդվածի 1-ին մասի 1-ին կետի, 80-րդ հոդվածի 1-ին մասի 4-րդ կետի, 96-րդ հոդվածի 1-ին մասի 9-րդ կետի և 192-րդ հոդվածի 1-ին մասի 1-ին կետի առնչությամբ ձևականորեն բարձրացնելով իրավական նորմի սահմանադրականության հարց՝ դիմողն իրականում առաջ է քաշում դատարանի գործողությունների իրավաչափության հարց, ինչը դուրս է Սահմանադրական դատարանի իրավասության շրջանակից, հետևաբար՝ **ենթակա չէ Սահմանադրական դատարանին:**



Սահմանադրական դատարանի՝ 2009 թվականի մարտի 17-ի ՍԴԱՌ-21 աշխատակարգային որոշմամբ արտահայտված իրավական դիրքորոշման համաձայն՝ բոլոր այն դեպքերում, երբ դիմողը, ձևականորեն վիճարկելով օրենքի դրույթի սահմանադրականության հարց, ըստ էության բարձրացնում է այդ դրույթի կիրառման իրավաչափության հարց, ապա այդպիսի դիմումները ենթակա են մերժման՝ որպես Սահմանադրական դատարանի քննության ենթակա հարց չառաջադրող դիմումներ:

Ելնելով վերոշարադրյալից և ղեկավարվելով «Սահմանադրական դատարանի մասին» սահմանադրական օրենքի 29-րդ հոդվածի 1-ին մասի 1-ին և 2-րդ կետերով, 69-րդ հոդվածի 5-րդ մասով՝ Սահմանադրական դատարանի դատական կազմը

### Ո Ր Ո Շ Ե Ց .

Նյուրա Բաղդասարյանի անհատական դիմումով գործի քննությունը մերժել:

Նախագահող՝

Անդամներ՝



Ա. Խաչատրյանի

Վ. Գրիգորյանի

Ա. Թունյանի